

मार्निंग डोगरी न्यूज बुलेटिन, समें. 09.20 Hrs

<><><><><><>

Headlines

- 1- उपराज्यपाल मनोज सिन्हा होरें श्री अमरनाथ जी दे पैहले जथे गी सख्त सुरक्षा बंदोबस्तें हेठ रवाना कीता। इस जथे च 4 जहार 603 श्रद्धालु हे।
- 2- पुलस महानिदेशक आर.आर स्वैन होरें श्री अमरनाथ जी दी जातरा दे आधार शिविरें दा दौरा लाया ते शिविर ते यात्रा दे रस्ते च कीते गेदे सुरक्षा इंतजामें दा जायजा लैता।
- 3- भारत दी टीम इंग्लैंड गी हराइए टी-20 विश्व कप दे फाइनल च पुज्जी गई ऐ।
- 4 राजौरी दे डिप्टी कमिशनर होरें जिला सतह दी NCORD कमेटी दी बैठक दौरान नशीले पदार्थ दे नियंत्रण लेई कीते गेदे तरीकेकारें दा जायजा लैता।

<><><><><><>

Amarnath-Yatra

लेफ्टिनेंट गवर्नर मनोज सिन्हा होरें अज्ज बड्डलै जम्मू दे भगवती नगर आले आधार शिविर थमां 4 जहार 603 अमरनाथ श्रद्धालुएं दे पैहले जथे गी श्री अमरनाथ जी दी जातरा लेई कश्मीर गितै रवाना कीता। एह तीर्थ जातरा कल कश्मीर घाटी दे पहलगाम ते बालटाल आले आधार शिविरें थमां शुरू होग। श्रद्धालुएं दे पैहले जथे गी अज्ज जम्मू थमां घाटी लेई रवाना करदे मौके एल.जी होरें आखेआ जे पिछले 3-4 बरें दरान श्रद्धालुएं लेई बड़ी सारी सुविधां

उपलब्ध करोआइयां गेइयां न ते ऐगती बी सब्बै जरूरी तैयारियां ते सुरक्षा दे निग्गर प्रबंध कीते गेदे न। अज्ज जम्मू थमां रवाना होए दे पैहले जत्थे च कुल 3 जहार 631 मर्द, 711 महिलां, 237 साधु, 15 साध्वियां ते 9 बच्चे शामिल न। 115 गड्डिएं दे काफिले च कुल 1 जहार 933 श्रद्धालु बालटाल लेई जिसले के 116 गड्डिएं दे काफिले च कुल 2 जहार 670 श्रद्धालु पहलगाम लेई रवाना होए न जित्थुं ओह कल श्री अमरनाथ जी दी जातरा शुरू करंगन। श्रद्धालुएं दी सुरक्षा लेई व्यापक इंतजाम कीते गेदे न। एह जातरा 19 अगस्त गी सम्पन्न होग। आकाशवाणी कन्नै गल्ल करदे होई श्रद्धालु नै आखेआ।

<><><><><><>

DGP-Yatra

पुलस महानिदेशक आर.आर स्वैन होरें कल श्री अमरनाथ जी दी जातरा दे आधार शिविरें दा दौरा लाया। उनें कश्मीर च बालटाल स्थित आधार शिविर ते जम्मू दे भगवती नगर आले आधार शिविर दा दौरा कीता। उनें रामबन दी चंद्रकोट थाहर दा बी दौरा लाया ते श्री अमरनाथ जी दी जातरा दी तैयारिएं दा जायजा लैता। इस दौरान डीजीपी होरें उत्थुआं दे अधिकारिएं थ्वां जानकारी हासिल कीती। मुख करी ध्यान पवित्र जातरा लेई औने आले श्रद्धालुएं दी सुरक्षा पर दिता गेआ। उनें जातरा पर पूरी नजर बनाई रक्खने लेई गलाया। उनें खुफिया जानकारी किट्ठी करने ते औदे आंकलन गी महत्वपूर्ण दस्सेया। उनें आखेआ जे एहदे कन्नै जातरा लेई आई सकने आली रूकावटें गी घट्ट करने च मदद थ्होग ते जातरा सुचारू ते रमानदारी आले ढंगे सिर सम्पन्न होग।

<><><><><><>

Amarnath Pilgrims Kathua

मुख्य भरै थां श्री अमरनाथ जी दी जातरा पर औने आले श्रद्धालु जम्मू कश्मीर दा प्रवेशद्वार लखनपुर पुज्जिए बड़े मते उत्साहित हे। यात्रा पर औने आले श्रद्धालुएं लेई खासे इंतजाम कीते गेदे न। इनें बंदोबस्तें पर श्रद्धालुएं संदोख जाहिर कीता। जिला प्रशासन कठुआ नै जम्मू-कश्मीर दे प्रवेशद्वार पर सुविधा केंद्र बी कायम कीते दा ऐ तां जे श्रद्धालुएं लेई एह जातरा रमानदारी आली बनी सकै। कठुआ दे डिप्टी कमिशनर राकेश मिन्हास होरें जानकारी दिती जे श्रद्धालुएं लेई रौहने-बौहने, आर.एफ.आई.डी काउंटर, मेडिकल स्हूलत, मुफ्त लंगर, ट्रैफिक प्रबंधन, पानी, शौचालय दी सुविधा सने होर दुए लोड़चदे इंतजाम कीते गेदे न। उनें दस्सेया जे यात्रा लेई सुरक्षा दे निग्गर बंदोबस्त कीते गेदे न। स्हाड़े संवाददाता कन्नै गल्ल करदे होई श्रद्धालु नै आखेआ।

<><><><><><>

Cricket

भारत नै आई.सी.सी टी-20 क्रिकेट विश्व कप दे दुए सेमीफाइनल च इंग्लैंड गी 68 रन्जें कन्नै हराइयै फाइनल च थाहर बनाई लैती ऐ। कल रातीं गुयाना च होए दे मुकाबले च इंग्लैंड नै पैहले टा जित्तियै गेंदबाजी दा फैसला लैता। भारत नै 20एं ओवरें च 7 विकटां मुहाइयै 171 रन्ज बनाए। कप्तान रोहित शर्मा नै सब्बनै शा मते 57 रन्ज बनाए। बरखा करी प्रभावित होए दे मैच च सूर्य कुमार यादव नै 47 रन्ज ते हार्दिक पांडेया नै 23 रन्जें दी पारी खेड्डी। इंग्लैंड दी तरफा क्रिस जाइन नै 3 विकटां जिसले के रीस टाप्ले, जोफरा आर्चर, सैम कुरन ते आदिल रशीद नै 1-1 विकेट लैती। 172 रन्जें दे लक्ष्य दा पिच्छा करदे होई इंग्लैंड दी टीम 16 ओवरें

ते 4 गेंदें च गै ढेर होई गईं। हुन फाइनल च भारती टीम दा मुकाबला कल बारबाडोस च दक्खन अफ्रीका कन्नै होग। भारती टीम त्री बारी टी-20 विश्व कप दे फाइनल च पुज्जी ऐ।

<><><><><><>

MKB

प्रधानमंत्री नरेंद्र मोदी होर औदे ऐतवार आकाशवाणी पर प्रसारित होने आले प्रोग्राम मन की बात राएं लोकें कन्नै अपने विचार सांझा करंगन। एह इस कार्यक्रम दी 111मीं कड़ी होग। एह प्रोग्राम आकाशवाणी पर हर म्हीने प्रसारित कीता जंदा ऐ। प्रधानमंत्री दे तौरा पर नरेंद्र मोदी हुंदे आस्सेआ लगातार त्री बारी संगंध चुक्कने मगरा एह पैहला मन की बात कार्यक्रम होग। इस प्रोग्राम गी आकाशवाणी ते दूरदर्शन दे समूलचे नेटवर्क पर प्रसारित कीता जाग। एह प्रोग्राम आकाशवाणी समाचार दी वेबसाइट ते newsonair मोबाइल ऐप पर बी उपलब होग। इस कार्यक्रम दा आकाशवाणी समाचार, दूरदर्शन समाचार प्रधानमंत्री हुंदे दफ्तर ते सूचना ते प्रसारण मंत्रालय दे यू-ट्यूब चैनलें पर लाइव प्रसारण कीता जाग। प्रसारण मगरा क्षेत्रीय भाषाएं च बी प्रसारण कीता जाग।

<><><><><><>

CBI NEET Arrest

सीबीआई नै नीट यू.जी म्तेहान च कथित बे-जाबतिएं दे सरबंथै च 2 लोकें गी गिरफ्तार कीता ऐ। सूत्रें मुजब इनें दौनें आरोपिएं गी बिहार दे पटना थवां हिरासत च लैता गेआ। नीट-यू.जी पेपर लीक मामले दी जांच सीबीआई करा'रदी ऐ। सीबीआई सोमवार बिहार पुलस दी आर्थिक अपराध इकाई दे दफ्तार पुज्जी ते मामले दी जांच शुरू कीती। EOU नै 5 मई गी पटना दे इक

स्कूल च छापेमारी कीती ही ते अद्दा फकोए दा Question पेपर जब्त कीता। मगरा उसी हजारीबाद स्कूल दे म्तेहान केंद्र Question पेपर कन्नै मलाया गेआ हा। सीबीआई नै 2 आरोपिं बददेव उर्फ चिंटू ते मुकेश कुमार गी पुच्छ पड़ताल लेई हिरासत च लैता ऐ।

<><><><><><><>

DC-Rajouri

राजौरी दे डिप्टी कमिशनर ओम प्रकाश भगत होरें कल जिला सतह दी .. कमेटी मीटिंग दी अध्यक्षता कीती ते जिले च नशीली दवाइएं दी कवैतू पर काबू पाने लेई कीते जा रदे हीलें गी बधाने पर जोर पाया। इत रबंधै च शिक्षा इदारें दी महत्वै आली भूमिका बारै गल्ल करदे होई डीसी होरें मुख शिक्षा अधिकारी गी स्कूली बच्चें गी नशीली दवाइएं दे माड़े प्रभावं बारै जागरूक करने लेई आखेआ। उनें इत सरबंधै च शुरू कीती गेदिं पैहलकदमिं गी होर तगड़ा करने लेई हर मेडिकल आहली हट्टी पर सीसीटीवी कैमरे लाने दे निर्देश दिते तां जे नशीली दोआइएं दी बिक्री पर रोक लाई जाई सकै। उनें लोकें गी जागरूक करने लेई बक्ख-बक्ख चैनलें दे जरिये जन-जन तक रस्नेहे पजाने लेई आखेआ। डीसी होरें नशीली दोआइएं दी लत च फसे दे लोकें गी नशामुक्ति केंद्रें च भेजने ते उंदे इलाज पर बी जोर भरेआ।

<><><><><><><>

DC-Kishtwar

किश्तवाड़ दे डिप्टी कमिशनर डॉ. देवांश यादव होरें कल महत्वै आले हितधारकें कन्नै लाई गेदी इक मीटिंग दी अध्यक्षता कीती ते जिला कैपेक्स योजना 2024-25 ते इलाका विकास योजना तैयार करने बारै चर्चा कीती। एहदे अलावा तज्वीज कीते गेदे निर्माण कम्में-कार्जे दी रफ्तार दा

बी जायजा लैता गेआ। सब्भने जिला अधिकारिं गी 2024-25 बरे लेई जिला कैपेक्स बजट दी सेक्टर स्हाबे बद्दोबद्द सीमां दस्सी दिती गई। एहदे अलावा सेक्टर स्हाबे, कार्य योजना अमल च लेआने लेई तफसील च दिशा-निदेश बी जारी कीते गे। इस बरे आली योजना तैहत स्कूलें च बाद्दू कमरे, खूबसूरती बधाने लेई गैलिंगं च स्ट्रीट लाइटां लाने लेई खम्बे लाना, आदर्श आंगनवाड़ी केंद्र स्थापित करना, सेहत, शिक्षा पर विशेष ध्यान देना। पीने आले पानी दी योजना तैहत जल शक्ति विभाग गी इस माली बरे च ओहकिं बस्सुएं च पीने आला पानी सप्लाई करने लेई पुख्ता प्रबंध करने दे निर्देश दिते गे।

<><><><><><>

DC-Reasi

जिला प्रशासन ते स्थानीय लोकाई च तालमेल बधाने लेई जिला विकास कश्मिनर रियासी विशेष महाजन होरें कल सुकेतर ग्रां दा व्याकपक दौरा लाया। अपने दौरें दौरान उनें स्थानीय बसनीके कन्नै गल्लकत्थ कीती। लोकें उन्दे अगगे अपनियां केई मंगां रक्खियां जियां स्थानीय ढांचागत विकास बधाने, डत्रके, शिक्षा, सेहत सेवां ते राईबाई दी स्थिति बेहतर करने लेई आखेआ। जिला विकास कमिशनर होरें लोकें दिएं मंगें गी त्रोइयै सुनेया ते सरबंधत विभागें गी उंदे पर तुरत कार्यवाही करने दे निर्देश दिते। स्थानीय नौजवानें गी सरकार दिएं मुमकन स्कीमें जनेइयें होरने पैहलकदमिं थमां लाह ठोआने ताई प्रेरित करदे होई डीडिसी होरें महिलाएं गी स्वयं रोजगार दे मौके बधाने लेई जम्मू-श्मीर राष्ट्रीय ग्रामीण आजीविका मिशन थमां लाभ ठोआने लेई आखेआ।

<><><><><><>

Baba-Chamliyal

अंतरराष्ट्रीय बन्ने पर जिला सांबा दे चमलियाल सेक्टर च कल सालाना बाबा चमलियाल मेला पूरे जोश ते जज्बे कन्नै मनाया गेआ। जम्मू-कश्मीर ते दुए राज्यें थमां आए दे जहारां बद्दे श्रद्धालुएं बाबा चमलियाल दा आशीर्वाद प्राप्त कीता। बाबा चमलियाल होरें गी दलीप सिंह मन्हास दे नां कन्नै बी जानेआ जंदा ऐ। बड्डलै सवेला थमां गै बाबा जी दे पवित्र स्थान पर श्रद्धालुएं दी अओजाई रम्भ होई गई ही। चमलियाल गां च अंतरराष्ट्रीय बन्ने पर लग्गने आले इस मेले दी प्रांतै च धार्मिक ते सांस्कृतिक महत्ता ऐ। जिला प्रशासन नै मेले गी बेहतर तरीके नै आयोजित करने लेई व्यापक इंतजाम कीते दे हे।

<><><><><><>

Weather

दक्खन पच्छिम मानसून नै जम्मू प्रांतै दे किश मैदानी हिस्सें गी प्रभावित करना शुरू करी ओड़े दा ऐ। एहदे कन्नोकन्नी पच्छमी गड़बड़िएं करी बी मौसम प्रभावित होआ रदा ऐ। उयां मौसम खुशक रौहने दी मेद ऐ पर जम्मू प्रांतै दे किश इलाकें च बरखा पेई सकदी ऐ। बरखा जां ते रातीं लै जां बड्डलै मुंह न्हरे पौने दी मती संभावना ऐ। कश्मीर च औंदे 48एं घैंटें च बड्डले आहला समां बागें च छिड़काव लेई माकूल रौहग।

<><><><><><>